

NO. SOALAN: 13

**PEMBERITAHUAN PERTANYAAN
MESYUARAT KETIGA, PENGGAL KEEMPAT
PARLIMEN KETIGA BELAS (2016)
DEWAN RAKYAT**

PERTANYAAN : LISAN

**DARIPADA : YB DATO' NORAINI BINTI AHMAD
[PARIT SULONG]**

TARIKH : 7 NOVEMBER 2016 (ISNIN)

SOALAN:

Dato' Noraini binti Ahmad [Parit Sulong] minta **PERDANA MENTERI** menyatakan sejauh manakah fahaman ajaran sesat menular di dalam negara dan apakah tindakan susulan oleh Kerajaan bagi menyekat gejala ini.

**JAWAPAN : (YB MEJAR JENERAL DATO' SERI JAMIL KHIR BIN HAJI
BAHAROM (B), MENTERI DI JABATAN PERDANA MENTERI)**

Tuan Yang di-Pertua,

Pada masa ini, fahaman dan ajaran sesat di dalam negara adalah terkawal. Pengawalan ajaran sesat adalah melalui Akta/ Enakmen Kesalahan Jenayah Syariah yang diperuntukkan di negeri-negeri. Pada masa yang sama, Kerajaan melalui Jabatan Kemajuan Islam Malaysia (JAKIM) dengan kerjasama Jabatan Agama Islama (JAIN) dan agensi lain serta Polis Diraja Malaysia (PDRM)

sentiasa berkerjasama dan menggembeleng tenaga dalam menguatkuasakan undang-undang yang berkaitan serta sebagai langkah pencegahan.

Antara langkah-langkah yang diambil adalah seperti yang berikut:

A) **Program jangka pendek** - adalah tindakan serta merta dan berterusan iaitu:

i. Pencegahan:

Menyebarkan fatwa-fatwa yang berkaitan, mengadakan program-program penjelasan fahaman-fahaman yang menyeleweng dari akidah Ahli Sunnah wal-Jamaah melalui ceramah, seminar dan menerusi media cetak dan elektronik. Sesi penjelasan secara bersemuka seperti mengadakan seminar bersiri iaitu JAWI Special Talk Siri I bertajuk "Ahli Sunnah wal-Jamaah vs Syiah" pada 1 September 2016 dan JAWI Special Talk Siri II bertajuk "Millah Abraham vs IS", Seminar Sufi Kebangsaan, Multaqa Pegawai Masjid, Guru Takmir, Guru KAFA dan Jawatankuasa Masjid Peringkat Negeri-negeri Seluruh Malaysia, Seminar Profesionalisme Imam dan Jawatankuasa Masjid di seluruh negeri, program Penerapan Nilai-nilai Islam. Manakala penjelasan melalui program-program menerusi media elektronik, dengan melibatkan stesen-stesen televisyen swasta dan kerajaan seperti Radio IKIM.fm, Radio Salam FM, Astro, TV Alhijrah, RTM, termasuklah khutbah antara lain bertajuk "Ajaran Sesat Membentuk Pemikiran Radikal", "Tiada Jalan Pintas ke Syurga" dan "Jerat Pemesongan Akidah".

ii. Pemantauan dan risikan:

Menjalankan program pemantauan terhadap individu atau kumpulan yang berfahaman menyeleweng daripada akidah ASWJ serta menapis bahan-bahan penerbitan sama ada bercetak atau elektronik.

iii. Penguatkuasaan undang-undang:

Meningkatkan kerjasama antara pihak berkuasa agama dan agensi keselamatan terhadap fahaman-fahaman yang telah diwartakan menyeleweng daripada akidah ASWJ. Selain daripada mekanisme yang sedia ada, penyelarasan maklumat antara negeri-negeri dijalankan melalui program antaranya seperti Konvensyen Perundangan Syariah Peringkat Kebangsaan Tahun 2016 pada 12 dan 13 Oktober 2016 dengan kerjasama Jakim, Jabatan Agama Islam Selangor dan Majlis Agama Islam Selangor dan Seminar Undang-undang Jenayah Syariah di Alam Siber Peringkat Kebangsaan pada 18 Oktober 2016.

iv. Gerak Saraf Perang Saraf (GSPS):

Mengadakan kerjasama dengan Jabatan Mufti, JAIN dan agensi-agensi keselamatan bagi sesi perbincangan dan dialog dengan pihak-pihak yang dikaitkan dengan fahaman yang telah difatwakan menyeleweng. Sesi dialog yang dijalankan turut melibatkan ahli pakar berkaitan akidah melalui jawatankuasa yang dibentuk sama ada di peringkat Jakim mahupun JAIN.

i. **Program Jangka Panjang** – iaitu:

Merangka Dasar dan Pelan Pencegahan Jenayah Syariah Malaysia. Kerajaan melalui JAKIM dengan kerjasama daripada agensi Kerajaan,

NGO dan IPTA telah berjaya memuktamadkan Dasar dan Pelan Pencegahan Jenayah Syariah Malaysia yang bertujuan untuk melahirkan ummah yang mempunyai keimanan yang teguh, komited, bertanggungjawab, mengamalkan akhlak-akhlak yang terpuji dan beristiqamah menjauhi kemungkaran dengan misi Ummah Sifar Jenayah Syariah;

- ii. Merangka Pelan Dakwah JAKIM yang meletakkan pengukuhan akidah sebagai salah satu teras utamanya bagi menghadapi fenomena langit terbuka dalam era globalisasi yang memberi ruang seluas-luasnya kepada serangan akidah umat Islam;
- iii. Melaksanakan program di bawah Pelan Tindakan Rancangan Lima Tahun Menangani Ancaman Akidah yang dirangka bagi memastikan kesucian agama Islam terpelihara dan memelihara serta mengawal akidah umat Islam daripada menyeleweng.
- iv. Melaksanakan aktiviti secara kerjasama melalui *National Blue Ocean Strategy* (NBOS) dengan kementerian dan agensi yang berkaitan dalam Jawatankuasa Pemandu Menangani Ancaman Akidah Peringkat Kebangsaan bagi merangka gerak kerja yang proaktif agar pelaksanaannya lebih cekap dan menyeluruh selari dengan kehendak dan cabaran semasa. Juga melalui mesyuarat High Level Committee (HLC) yang dipengerusikan oleh YAB TPM bagi membincangkan isu-isu berkaitan bahan penerbitan berkenaan Islam.

Sekian, terima kasih.